

खबरां

- राष्ट्रपति द्रौपदी मुर्मू होरें अज्ज शामी राष्ट्रपति भवन च नागकि सम्मान समारोह दे दुए चरण च पदम पुरस्कार प्रदान कीते।
- गृह मंत्री अमित शाह होरें आखेआ ऐ जे धारा 370 गी हआने कन्नै श्यामा मुखर्जी हुं'दा सुखना साकार होई गेआ ऐ।
- राष्ट्री सुरक्षा सलाहकार अजीत डोभाल होरें आखेआ ऐ जे होमूर्ज जलडमरूमध्य दे खुल्लने कन्नै मुख्य भरै च उर्जा सुरक्षा मजबूत होगा।
- प्रवर्तन निदेशालय (ई.डी) नै शिक्षक भर्थी परीक्षा च कथित धांधली दे मामले च तमिलनाडू दे 18 थाहें दी तपाशी कीती।
- लियोनेस मेसी नै फीफा विश्व कप इतिहास दे सब्भनें शा मते गोल करने दा रकार्ड त्रोडी दित्ता ऐ ते उनें अर्जेटीना गी नाकआउट चरण च पजाया ऐ।
- ते हाकी च भारत अज्ज लंदन च एफ.आई.एच प्रो. लीग दे शुरूआती मैच च भारत ते पाकिस्तान बश्कार मकाबला होआ'रदा ऐ।

<><><><><><>

Prez. Padam Awards

राष्ट्रपति द्रौपदी मुर्मू होरें अज्ज संज्ञा राष्ट्रपति भवन च आयोजित दुए नागरिक सम्मान समारोह च पद्म पुरस्कार भेंट कीते। पद्म पुरस्कार देश दे सर्वोच्च नागरिक सम्मानें चा इक्क ऐ। एह पुरस्कार पद्म विभूषण, पद्म भूषण ते पद्म श्री त्रै श्रेणियें च दित्ते जंदे न। पत्रकार पी. नारायणन गी साहित्य ते शिक्षा दे क्षेत्र च पद्म विभूषण ते साबका न्यायधीश के.टी. थॉमस होरें'गी समाज सेवा आस्तै पद्म विभूषण कन्नै सम्मानित कीता गेआ। साबका टेनिस खडारी विजय अमृतराज, अभिनेता ममूटी ते पार्श्व गायिका अलका याग्निक गी पद्म भूषण पुरस्कार प्रदान कीते गे। सरकार नै इस ब'रे कुल 131 पद्म पुरस्कारें दी घोषणा कीती ही। इन्दे च 5 पद्म विभूषण, 13 पद्म भूषण ते 113 पद्म श्री पुरस्कार शामिल न। 1954 च शुरू कीते गेदे इनें पुरस्कारें दी घोषणा हर ब'रे गणतंत्र दिवस दे मौके पर कीती जंदी ऐ। कला, साहित्य, शिक्षा, खेडू, चिकित्सा, समाज सेवा, विज्ञान ते इंजीनियरिंग, सार्वजनिक मामलें ते बपार ते उद्योग समेत बक्ख-बक्ख खेत्तरें ते विशें च विशिष्ट ते असाधारण उपलब्धियें आस्तै एह पुरस्कर दित्ते जंदे न।

<><><><><><>

गृह मंत्री अमित शाह होरें अज्ज आखेआ ऐ जे धारा 370 गी खत्म करने दे कन्नै गै डाक्टर श्यामा प्रसाद मुखर्जी हुंदा सुचाना साकार होई गेआ ऐ। अमित शाह होरें डाक्टर श्यामा प्रसाद मुखर्जी हुंदी पुण्यतीथी पर श्रद्धांजलि अर्पित करदे होई उनेंगी देसै दे म्हान नेताएं चा इक्क दस्सेआ। उनें आखेआ ऐ जे डा. मुखर्जी हुंदे योगदान नै देसै दी एकता ते अखंडता गी बनाई रखने आस्तै महत्वपूर्ण भूमिका निभाई ऐ। नमीं दिल्ली च नैफेड दे नीलामी पोर्टल दे शुभारम्भ दे मौके पर शाह होरें आखेआ जे 23 जून भारती जनता पार्टी दे कार्यकर्ताएं आस्तै खास महत्व रखदा ऐ कीजे इस्सै ध्याड़े श्यामा प्रसाद मुखर्जी होरें राष्ट्र दी एकता आस्तै अपने प्राणें दा बलिदान देई दित्ता हा। इस मौके पर शाह होरें करसानें दी सिद्दी भागीदारी गी मजबूत करने आस्तै खरीद कम्में च बिचैलियें दी भूमिका गी खत्म करने दा आह्वान कीता। नैफेड दी प्रगति दा जिक्र करदे होई अमित शाह होरें आखेआ जे 12 बरें पैहले मती वित्तीय कठनाइयें दा सामना करा'रदा एहू संगठन अज्ज 74 लक्ख करसानें दी सेवा करने आह्ला इक्क मजबूत संस्थान बनियै उभरेआ ऐ।

<><><><><><>

VP/PM Tributes

उपराष्ट्रपति सी.पी राधाकृष्णन ते प्रधानमंत्री नरेंद्र मोदी होरें डाक्टर श्यामा प्रसाद मुखर्जी हुंदी पुण्यतीथी पर उनेंगी श्रद्धांजलि भेंट कीती। इक सोशल मीडिया पोस्ट च उपराष्ट्रपति होरें डा. मुखर्जी होरें गी इक महान नेता, मन्ने-परमन्ने दे शिक्षाविद ते सच्चे देशभक्त दे तौरा पर चेता कीता। प्रधानमंत्री नरेंद्र मोदी होरें बी सोशल मीडिया पोस्ट च आखेआ जे डा. श्यामा प्रसाद मुखर्जी होरें अपना पूरा जीवन देसै दे बाढ़े विकास आस्तै समर्पित कीता हा। उनें इब्बी आखेआ जे डा. प्रसाद हुंदा पक्का धेइया, राष्ट्रहित आस्तै औने आहली पीढ़ियें गी प्रेतिर करदा रौहगा।

<><><><><><>

PM-Nagrik Devo

प्रधानमंत्री नरेंद्र मोदी होरें नागरिक देवो भव दी भावना पर जोर दिंदे होई अधिकारिणें गी आखेआ ऐ जे ओहू अपने कम्में-कारवाइएं च आम नागरिक गी सारें शा उप्पर रखूउने दा आह्वान कीता ऐ। अज्ज नमीं दिल्ली च बक्ख-बक्खमंत्रालयेंते मैहकमें च सहायक सचिवें दे रूपै च नियुक्त आई.ए.एस-2024 बैच दे 183 सखेत्रु अधिकारिणें कन्नै गल्लबात करदे होई मोदी होरें युवा आईएएस अधिकारिणें अगगे आह्वान कीता जे ओहू 2047 तगर भारत गी इक विकसित राष्ट्र बनाने दी जात्तरा दी अगुवाई करन। प्रधानमंत्री होरें उनेंगी पकके धेइये, नवाचार ते नागरिक केंद्रित शासन राएं राष्ट्र निर्माण लेई अपने आपै गी समर्पित करने दा बी आह्वान कीता। उनें इस गल्लै पर बी जोर दित्ता कि प्रमुख विकास चुनौतिणें दा नबेड़ा बक्ख-बाहरा रेहियै नेई कीता जाई सकदा। उनें आखेआ जे सार्थक ते टिकाउ नतीजे हासल करने लेई विभागें बश्कार नेड़मा तालमेल होना बी बड़ा जरूरी ऐ। विकसित भारत 2047 दे विजन दा जिक्र करदे होई मोदी होरें आखेआ कि औने आहले दाहकें च हर नीति ते प्रशासनिक फैसलें दा उद्देश्य इक विकसित भारत दा निर्माण करना होना लोड़चदा।

<><><><><><>

US-Iran MOU

भारत नै अमरीका ते ईरान बश्कार होए दे समझौते ज्ञापन दा सुआगत कीता ऐ। नमीं दिल्ली च ब्रिक्स देशें दे राश्ट्री सुरक्षा सलाहकारें दी 16मीं बैठक गी संबोधित करदे होई राश्ट्री सुरक्षा सलाहकार अजीत डोबाल होरें आखेआ ऐ जे इस विकास कन्नै दुनिया भरै च उर्जा सुरक्षा गी मजबूती थोग। उनें होमुर्ज जलडमरूमध्य दे खुल्लने दा बी सुआगत कीता। ते इस गल्लै पर जोर भरेआ ऐ जे एह्दे कन्नै आपूर्ति शृंखला च अड़चने गी दूर करने ते खाद्य ते रसायनिक चीजें दी कमी गी दूर करने च मदद थोग।

<><><><><><>

Ed-Searches

प्रवर्तन निदेशालय शिक्षक भर्ती स्तेहानें च कथित तौरा पर धोखाधडी आहले मामले च चेन्नई, तिरुचिरापल्ली, कोयंबटूर ते मदुरै दे 18 परिसरें च तपाशी अभियान चला'रदा ऐं निदेशालय नै दस्सेआ ऐ जे एह् कार्रवाई केंद्री अपराध शाखा आसेआ 2017 बरे च दर्ज कीती गेदी एफाआईआर दे आधार पर कीती जारदी ऐ।

<><><><><><>

India Us Trade Talks

भारत ते अमरीका नै अज्ज इक प्रस्तावित दपक्खी बपार समझौते गी नमें सिरेआ तैऽ करने आस्तै उच्चि सतह दी गल्लबात शुरू कीती। एह्दे थमां पैहले अमरीकी टैरिफ नीति च बदलावें दे कारण इस बरे दी शुरूआत च तैऽ कीते गेदे ढांचे च रुकावट आई गई ही। बन्ज ते उद्योग मंत्री पीयूष गोयल होरें नमीं दिल्ली च अमरीकी बपार प्रतिनिधि जैमीसन ग्रीर ते भारत च अमरीका दे राजदूत सर्जियो गोर हुंदे नै मलाटी कीती।

<><><><><><>

US-package

अमरीका नै भारत दी M777A2 अल्ट्रा लाइट हाविलजर तापें दे रख-रखाव आस्तै 23 करोड़ डालर दे पैकेज दी घोशणा कीती ऐ। सोशल मीडिया पोस्ट च भारत च अमरीका दे राजदूत सर्जियो गोर होरें आखेआ ऐ जे भारत ते अमरीका बश्कार रक्षा सांझेदारी लगातार बधा करदी ऐ ते ओह् प्रस्तावित बिक्री गी खीरी रूप देने आस्तै तैयार ऐ।

<><><><><><>

SIT-Ayodhya Donation

अयोध्या राम मंदर च दान ते चढतन च कथित गड़बड़ियें दी जांच करा'रदी त्रै मैम्बरी खास जांच टीम नै अज्ज अपनी शुरूआत रिपोर्ट पेश करी दिती ऐ। रिपोर्ट गी सिट दे प्रधान विजय विश्वास पंत होरें अतिरिक्त मुख सचि संजय प्रसाद गी सौंपदी जेड़े लखनउ दे कमिशनर ना। रिपोर्ट जमा कराने दे मगरा विजय विश्वास होरें आखेआ जे एह् पैहली रिपोर्ट पेश कीती गई ऐ। इस उच्च स्तरीय पैनल दा गठन राज्य सरकार नै कथित तौरा पर माली गड़बड़ी ते धन दे दुरुपयोग दी जांच लेई कीता हा। टीम नै अपनी पैहली रिपोर्ट पेश करी दिती ऐ। सिटी दे सदस्यें पिछले हफ्ते मते सारे संदिग्धयें ते मंदर ट्रस्ट दे अधिकारियें पुच्छ-गिच्छ कीती। रिपोर्ट च दिती गेदी सफारशें दे आधार पर अग्रे दी कार्रवाई तौलें

गै होने दी मेद ऐ। अयोध्या राम मंदर मिले दे दान दे गलत इस्तेमाल दे बारै च आरोप सामने आने दे मगरा मंदर ट्रस्ट आसेआ कीती गेदी गुजारश पर उत्तर प्रदेश सरकार नै 13 जून गी सिट दा गठन कीता हा।

<><><><><><>

FSL-Lucknow Fire

फारेंसिक साइंस लैबोरेटरी दे माहिरें ते विशेष जांच टीम दे सदस्यें दी सांझी टीम नै लख्खानऊ च अगग लग्गने आहली थाहरा दा मुआयना कीता। इलाके दा मुआयना करने मगरा लखनऊ जोन दे एडीजी प्रवीण कुमार होरें दस्सेआ ऐ जे टीम हर पैहले दी पूरी जांच करग ते हर मैहकमें दी जिम्मेदारियें दी तफसीली जांच करग। दुई बक्खी 6 मिम्बरी फोरेंसिक साइंस लैबोरेटरी दी टीम नै मौके परां गै सबूत किट्टे कीते तां जे अगग लग्गने दा कारण पता लाया जाई सके। उआं लखनऊ विकास प्राधिकरण नै इस ईमारत गी ढाहने दा नोटिस जारी कीता ऐ। त्रै मंजला ईमारत गी 2016 ब'रे च गेर मंजूरी निर्माण कम्म दे चलदे इसी ढाहने दा निर्देश जारी कीता गेआ हा पर दो म्हीने थमां बी घट्ट समें च इस हुक्म गी रद्द करी दित्ता गेआ हा।

<><><><><><>

SMVD-Yatra

श्री माता वैश्वो देवी जात्तरा नै मौजूदा बरे च इक महत्वपूर्ण उपलब्धि हासल कीती ऐ कीजे जंदे रोज तगर माता दे दरबार च मत्था टेकने आलेश्रद्धालुएं दी गिनतरी 50 लक्ख दे आंकड़ें गी पार करी गई ऐ। कुल 50 लक्ख 70 ज्हार श्रद्धालुएं पवित्र तीर्थ यात्रा कीती ऐ। एह उपलब्धि पिछले ब'रे दी इससे अवधि दे मकाबले बड़ी मती ऐ। इससे अवधि दरान पिछले ब'रे तकरीबन 39 लक्ख 84 ज्हार श्रद्धालुएं पवित्र गुफा दे दर्शन कीते हे।

<><><><><><>

FIFA-World Cup

लियोनेस मेसी नै फीफा विश्व कप इतिहास दे सब्भनें शा मते गोल करने दा रकार्ड त्रोड़ी दित्ता ऐ। कल आस्ट्रेलिया खलाफ 2-0 कन्नै हासल जित्त दे दरान अपने 2 गोल कन्नै कुल 18 गोल हासल करियै जर्मनी दे मिरोस्लाव क्लोस दे 16 गोल दे रकार्ड गी पिच्छे छोड़ी दित्ता। मैच दे 38में मिनट च अपना 17मां गोल करियै उनें रकार्ड त्रोड़ेआ ते मैच स्टापेज टाइम च इक होर गोल करियै अपना कुल स्कोर 18 तगर पुजाई दित्ता।

<><><><><><>

Hockey

एफ.आई.एच प्रो. लीग च अज्ज एल्लै भारत ते पाकिस्तान बश्कार मैच खेडेआ जा'रदा ऐ। मैच लंदन दे ली वैली हाकी एंड टेनिस सेंटर च हुनै कोला किश चिर पैहले शुरू होआ ऐ। भारती हाकी टीम नै हाल च गै ओलंपिक चैंपियन नीदरलैंड गी हराए दा ऐ ते ओहदे होसले पूरी चाल्ली बुलंद न। भारत ते पाकिस्तान दियां टीमां 2024 च चीन दे हुलुनबुइर च होए दे एशियाई चैंपियन्स ट्राफी मकाबले दे बाद पैहली बारी अज्ज सामने न। 9 टीमें आहली इस प्रो. लीग तालिका च भारत अजे बी 8में नंबर पर ऐ जिसलै जे पाकिस्तान अजे धोड़ी कोई अंक हासल नेई करी सकेआ ऐ।

IMD

मौसम विभाग नै अज्ज पूर्वोत्तर ते पच्छिम बंगाल दे किश हिस्सें च भारी बरखा बरने दा आरेंज अलर्ट जारी कीता ऐ। तटीय कर्नाटक, कोंकण, गोवा, ओडिशा ते तेलंगाना च बी कल्लै तगर भारी बरखा बरी सकदी ऐ। मौसम विभाग नै दिल्ली, हरियाणा, पंजाब, चंडीगढ़ ते उत्तराखंड च अज्ज गरजी-लिशिकयै बद्दल बरने ते तेज अंधी-झक्खड़ झुल्लने दी पेशनगोई कीती ऐ। मौसम एजेंसी नै अज्ज छत्तीसगढ़, मध्य प्रदेश दे पूर्वी हिस्सें ते उत्तर प्रदेश च लू चलने दी मेद दस्सी ऐ ते अगले त्रऊं दिनें दरान उत्तर पच्छिम भारत च बद्दोबद्द तापमान च दो थमां त्रै डिग्री सेल्यिस बाद्दा दर्ज होने दी पेशनगोई कीती ऐ।

<><><><><><>

Monsoon

महाराष्ट्र च परतियै मानसून फही सरगर्म होई गेआ ऐ। मुम्बई दे नेडमें शैहरें च अज्ज उप्परोतली त्रीये रोज बी बरखा जारी ऐ। मौसम मैहकमे नै जानकारी दिती ऐ जे दक्खन पच्छमी मानसून मध्य अदब सागर दे बाकी हिस्सें सने मुम्बई, महाराष्ट्र ते किश हिस्सें ते मध्य ते पूर्वी भारत दे किश इलाकें च अग्गे बधी गेआ ऐ। मौसम मैहकमे नै लोकें गी सतर्क रौहने दी सलाह दिती ऐ कीजे औने आहले किश घंटें दरान मुम्बई शैहरा ते एहदे आले-दोआले दे नगरे, पुणे दे घाट आहले इलाकें, रायगढ़ ते रतनागिरी ते दरमयाने दर्जे थमां लेइयै मती भारी बरखा बरने दे इमकान दस्से गे न।

<><><><><><>

Traffic Advisory

श्री अमरनाथ जी जात्तरा-2026 कोला पैहले जम्मू-कश्मीर पुलस नै इक व्यापक ट्रैफिक ते जात्तरा परामर्श जारी कीता ऐ। आकाशवाणी दे जम्मू संवाददाता नै जानकारी दिती ऐ कि जात्तरा दे लंगघने दरान किश समें लेई नवयुग सुरंग च आम गड्डियें दे गुजरने पर रोक लग्गी दी रौहगा। कश्मीर घाटी थमां जम्मू औने आहिलयें गड्डियें गी बडलै साड्डे 11 बजे कोला पैहले लंगघने दी इजाजत नेई होग जिसलै कि जम्मू थमां घाटी आहली बक्खी जाने आहिलयां गड्डियां दपैहरी 3 बजे दे बाद उत्थुआं नेई लंग्घी सकंगन।

<><><><><><>

LG-Seva Se Samridhi

उपराज्यपाल मनोज सिन्हा होरें अजज केंद्री पंचैती राज मंत्रालय ते जम्मू-कश्मीर प्रशासन आसेआ आयोजित सेवा राहें समृद्धि क्षेत्रीय कार्यशाला गी संबोधित कीता। एल.जी सिन्हा होरें प्रधानमंत्री नरेंद्र मोदी हुंदी अगुवाई च होई दी ऐतिहासिक तब्दीलियें ते 3 स्तरी पंचैती राज प्रणाली राहें होए दे समावेशी विकास पर लोऽ पाई। उनें आखेआ जे बरे 2020 च केंद्र दी तरफा इक ऐसा जम्मू-कश्मीर बनाने लेई कम्म शुरू कीता गेआ जित्थें सरकार लोकें दे घरें तगर पुज्जियै उनेंगी सेवा उपलब्ध कराई सकै। उनें आखेआ जे लोकें गी पैहली तरजीह देने आले नजरिये कन्नै असें सार्वजनिक सेवां देने च क्रांतिकारी बदलाव आहनने दा कम्म शुरू कीता ऐ। उनें आखेआ जे 2020 च छडी 35 आनलाइन

सेवां हिआं, जिसलै के 2023 तगर एह 1100 कोला मती होई गेइयां। उनें इब्बी आखेआ जे जम्मू-
कश्मीर ई-सेवा उपलब्ध करोआने च अब्बल रेआ ऐ।

<><><><><><>